

УРХУН БИТИГЛАРИ



1889 йил, кимсасиз Мўғул чўли. Бепоён кенгликларда аҳён-аҳёнда одам яшайдиган кулбалар учрайди. Озиқовқатни етарлича ғамламай, узоқ йўлга енгил-елпи отланган киши бу жойларда жуда қийналади.

Дарё соҳилидан совуқ шамол эсади. Гарчи июнь ойи бўлса ҳам совуқ шамол сувак-суваккача ўтиб кетади. Отда буқчайиб олган бир неча чавандоз Урхун дарёсининг чап соҳили бўйлаб кетяпти. Улар кетидан икки от араваларни аранг тортиб бормоқда. Араваларнинг бирида оғир касал Н. Ядринцев ётибди. У бошчилик қилаётган кичкина экспедиция неча-неча кунлардан бўён Мўғулистаннинг кам ўрганилган районлари ичкарисига тобора кўпроқ кириб бормоқда. Кўп нарса планлаштирилган, ҳаммасига улгуриш керак. Шунинг учун ҳам Н. Ядринцев шундай оғир йўллардан бормоқда...

Экспедиция аъзолари қадимги турк давлати маркази бўлгани Қорақурум шаҳри харобаларидан қадимги турк даврига оид жуда кўп материаллар — балбаллар (боши кесик ҳайкалчалар), турли ҳайвонлар тасвирини топдилар. Уларни жуда қизиқтирган нарса ёзув битилган тошлар бўлди.

Дастлабки топилган битигтошларнинг орқа томонида хитойча текст ҳам бор эди. Бу хитойча текстлардан маълум бўлдики, битигтошлар турк хоқони Билга хоқон ва унинг укаси, турк давлатининг лашкарбошиси Кул тигин шарафига битилган эди. Аммо битигларни ҳеч

ким ўқий олмади. Узоқ изланишлардан сўнг даниялик олим В. Томсен 1893 йилда бу ёзувларни ўқишига муваффақ бўлди.

Едномалардаги воқеалар ва шахслар тарихий бўлиб, ўз даврининг барча томонлари — туркий халқларнинг моддий, ижтимоий-сиёсий ҳаётини қамраб олади, шунингдек, ўша даврдаги қабилалар ҳаётида юз берган жиддий ўзгаришлар, бошқа халқлар билан муносабатлари ўз аксини топган. Фақат шугина эмас. Битигтошлар энг аввало туркий халқларнинг ёзма адабиёти намуналариидир. Битигларда тасвирланган воқеаларнинг реал тарихий асослари халқ оғзаки ижоди мотивлари заминида бирикиб, ёзма адабиётнинг алоҳида бир турини юзага чиқарган. Айниқса қаҳрамонлик, ватанпарварлик, гуманистик гояларнинг бош ўринга чиқиши алоҳида диққатга сазовардир.

ТЎНЮҚУҚ БИТИГИ

Бу битигтош иккинчи турк хоқонлигига асос солган Элтариш хоқоннинг маслаҳатчиси ва саркардаси Тўньюқуқ бағишлиб 712-716 йилларда ёзилган. Тўньюқуқ Қопоғон ва Билга хоқонларнинг ҳам маслаҳатчиси бўлган. Тўньюқуқ битигини ўзи тириклигида ёздирган. Битигтош Монголиянинг Баин-Цокто манзилидан топилган ва ҳозир ҳам ўша ерда сақланади.

Битигда туркийларнинг бир қанча душман қабилаларга қарши кураши, Тўньюқуқнинг халқ олдидаги хизматлари ҳикоя қилинади. Битигда Тўньюқуқнинг хизматлари юксак баҳоланади. Тўньюқуқ бутун куч-ғайратини халқни душмандан ҳимоя қилишга, унинг ғалабаси учун сарфлайди. Тўньюқуқнинг донолиги, тадбиркорлиги, жасурлиги кўп ғалабаларнинг гарови сифатида таъкидланади. Сатрларда баён этилган воқеалар Тўньюқуқнинг фаолиятини ва унинг турк халқига содиқлигини кўрсатади.

Тўньюқуқ битиги ҳам юксак савияда ёзилганлиги учун ва гуманизми, айниқса қаҳрамонлик мотивининг асосий ўрин тутганлиги билан аҳамиятлидир. Мазкур битигда халқ мақол ва маталларининг кўп қўлла ниши унинг бадиий ифода имкониятларини кенгайтирган.

ТҮНЮҚУҚ БИТИГИ

Доно Түньюқуқ—мен ўзим, Табғач давлатида тарбияландим. Турк халқи Табғач давлатига бўйсунар эди.

Турк халқи ўзининг хони билан ҳам бўлмай, Табғач хоқонлигига қўшилди, хонлик бўлди. Ўз хонини қўйиб, яна Табғач хоқонлигига қўшилди. Тангри шундай деган экан: Хон бердим. Хонингни қўйиб таслим бўлдинг. Табғачга таслим бўлгани учун тангри ўл, деган шекилли.

Турк халқи ўлди, йўқ бўлди, тугади. Турк сир халқи ерида бирорта ҳам уруғ қолмади. Ичкарию ташқарида қолгани тўпланиб етти юзта бўлди, икки қісми отлиқ, бир қісми яёв эди. Етти юз кишини уюштирадиган бошлиғи шад эди. Унвон ол, деди. Унвон оладигани мен эдим — Билга Түньюқуқ. Хоқонни ҳам қўлга олайин, дедим, сўнгра ўйладим: ориқ буқа ва семиз буқани (биров) тезагидан билса, биров семиз буқа ва ориқ буқани ажрата олмас эмиш, шундай деб ўйладим. Шундан сўнг Тангри билим бергани учун фақат ўзим хоқонни қўлга олдим, доно Түньюқуқ, бўйла баға тархан билан Элтариш хоқон бирга бўлиб, жанубда Табғачни, Шарқда Хитойни, шимолда ўғузни кўплаб ўлдириди. Алломаси, човуши мен ўзимгина эдим. Чугай кузни ва Қорақумни манзил қилиб олган эдик. У ерда кийик еб, қуён еб турар эдик. Халқнинг томоги тўқ эди. Душманимиз атрофга қанотини етказди. Биз шай эдик, шундай турар (яшагувчи) эрк ахли. Ўғуздан ўшандада кузатувчи келди. Кузатувчининг таплари шундай: Тўқуз ўғуз халқи устига бир хоқон ҳукмрон бўлди, дейди. Табғачга Куни Сангунни юборибди, Хитойга Тўнгра Семни юборибди. Уларга шундай гап юборибди: озгина турк халқи юрган эмиш. Хоқони баҳодир экан, маслаҳатчиси аллома экан. Ўша икки киши бор бўлса, сени, Табғачни ўлдиражак, дейман, шимолда Хитойни ўлдиражак, дейман, мени, ўғузни у ҳам ўлдиражак, дейман. Табғач, сен ўнгдан ҳужум қил! Хитой, олдидан ҳужум қил! Мен чапдан ҳужум қиласай. Турк сир халқи ерида бошқа эга юрмасин. Эпласак, ўша эгани йўқ қиласайлик, дейман. Уша гапни эшишиб, тун ухлагим келмади, кундуз ўтиргим келмади. Ундан сўнг хоқонимга илтимос қилдим. Шундай илтимос қилдим: Табғач, ўғуз, Хитой — бу учови қамал қилса, қамалда қолажакмиз. Унда вужудининг ичи-тошини — молу жонини топширган кишидай бўламиз. Юпқа йигин тор-мор қилишга осон эмиш, ингичка йигин узишга осон эмиш. Юпқа қални бўлеа, тор-мор қиладиган баҳодир

эмиш. Ингичка йўғон бўлса, узадиган баҳодир эмиш. Шарқда Хитойдан, жанубда Табғачдан, ёарбда Қурдан-дан, шимолда Ўғуздан ҳимояланиш учун икки-уч минг аскаримиз бор. Бундан бошқа келадиганимиз бормиди? Шундай деб илтимос қилдим. Хоқоним, мен доно Тўнью-қуқнинг арзини эшилди. Кўнглингга қараб йўл тут,— деди. Кўк ўнгни юқорилаб, Ўтукан йишига томон йўл олдим. Инигак кўл бўйига Тўғладан Ўғуз келди. Уларниро лашкари уч минг экан, биз икки минг эдик, урушдик, тангри ёрлиқади, қочирдик, дарёга тушди. Қочган йўлида яна ўлди. Шундан кейин ўғуз кўплаб таслим бўлиб келди. Мен ўзим турк халқини ҳам Ўтукан ерига келтирдим. Билга Тўньюқуқ Ўтукан ерига қўнибди деб эшишиб, жанубдаги, шимолдаги халқ келди. Биз икки минг эдик, икки қўшин бўлди. Турк халқи ер юзига ўрнашгандан бери, Турк хоқони тахта ўрнашгандан бери Шантунг шаҳрига, денгиз, дарёга етмаган эди. Хоқонимга арз қилиб лашкар тортидим.

Шантунг шаҳрига, денгиз, дарёга етказдим, йигирма уч шаҳар мағлуб бўлди. Душманнинг уйқуси ҳаром бўлиб, чўл-биёбонда ётиб қолди. Табғач хоқони душманимиз эди. Ўн ўқ хоқони ҳам душманимиз эди. Үндан ортиқ қирғизнинг қудратли хоқони душманимиз бўлди, ўша уч хоқон маслаҳатлашиб, Олтин йиши устига талон солайлик депти, шундай маслаҳат қилишибди. Шарққа Турк хоқонига лашкар тортайлик депти, унга қарши лашкар тортмаса, қачон ғазабланса, у бизни йўқ қиласди, депти. Хоқони баҳодир экан, маслаҳатчиси аллома экан, қачон ғазабланса, ўлдирадиган кўринади. Учовимиз ёнирилиб ҳужум қилайлик, уни йўқотайлик депти. Тургаш хоқони шундай депти: менинг халқим у ерда бўлади. Турк халқи яна ҳаяжонда депти. Ўғузи яна пароканда депти. Ўша гапини эшишиб тунлари уйқум келмас эди, кундузлари ўтиргим келмас эди. Шундай ўйладим: Табғач, ўн ўқ, қирғиз хоқонига Кўғман тоғидан ошиб ўтиб ҳужум қиласмиш. Шунинг учун аввал биз лашкар тортайлик дедим.

Кўғман йўли битта экан. Йўлни қор босган деб эшишиб, бу йўл билан юрса ярамайди, дедим. Ерчи (ер биладиган киши) суриштирдим. Чўллик аз қабиласидан бир йигитни тоидим. Аз ерини у яхши билар экан, бир манзили бор экан. Ани дарёси билан борилар экан, ўша ерда ётиб, бир отлиғ йўл юриб борилади, деди. Ўша йўл билан юрса имкон бор деб ўйладим. Хоқонимга буни айтиб. қўшинни йўлга солдим, отлантири!— деб буйруқ бердим.

Оқ тармал (ҳозирги Хуа Қэм) дарёсини кечиб ўтиб, қўшинга лагерь қуришга ижозат бердим. Бир оз дам олгач, отланишга буйруқ бердим, қорни ёриб, юқорига отни етаклаб, ўзимиз яёв юриб, дараҳтларга таяниб қўшинни чиқардим. Олдиндаги йигитлар илгарилаб, ўсимликлар бор довондан ошдик. Ундан қийналиб пастга тушдик. Үн кун давомида биз ёnlама йўллардан юрдик, тўсиқни айланиб ўтдик. Ерчи ҳам янгишиб, бўғизланди. Хоқон хафа бўлиб, отларни чоптиргилар, деди.

Ани дарёсидан борайлик!— дедим. Дарё сувининг қўйи томонига юрдик. Лашкарни санагани туширдик, отларни ўтга бойладик. Қейин яна йўлга тушдик. Кун ҳам, тун ҳам елиб бордик. Қирғизни уйқуда босдик. Биз лашкарларимизнинг энгагини (олд қисмини) жангга киритдик. Қирғиз хонининг лашкари йиғилди. Жанг қилдик, санчдик, хоқонини ўлдиридик. Бизнинг хоқонга қирғиз халқи таслим бўлди, таъзим қилди. Қайтдик. Яна Қўгманни айланиб келдик. Қирғиздан қайтганимиздан сўнг, Тургаш хоқонидан кузатувчи келди. Гапи шундай: Шарқдан Турк хоқонига қўшин тортайлик, қўшин тортмасак, у бизни йўқ қиласди. Хоқони баҳодир экан, маслаҳатчиси аллома экан, ҳар қандай йўл билан бизни ўлдирадиган кўринади, депти. Тургаш хоқони йўлга чиқибди, деди. Үн ўқ халқнинг ҳаммаси чиқибди, деди. Табғач лашкари ҳам бор экан, ўша гапни эшитиб, хоқоним мен уйга тушайин, деди. Хотини вафот этган эди. Унинг маросимини ўтказайин, деди. Қўшин билан боринг, деди. Олтин йишда ўрнашинг, деди. Лашкарбоши Йнол хоқон, Тардуш шад борсин деди. Доно Тўнюқуқقا — менга айтди: бу қўшинни олиб бор, деди. Қараму ғазабни кўнглингдагидай қил, мен сенга нима ҳам дейин, деди. Душман келадиган бўлса, баҳодир йигитларни йиғ ва душмани ўлдир. Келмайдиган бўлса, тил тутиб маълум олиб тур, деди.

Олтин йишда ўрнашдик. Уч кузатувчи киши келди, гапи бир: Хоқони лашкар билан йўлга чиқсан, ўн ўқ лашкари бекаму кўст чиқсан, деди. Йарис даштида йингиламиш, деган. Ўша гапни эшитиб, хоқонга у гапни жўнатдим: «Нима ўйлайин!» Гапни олиб қайтиб келди: шу ерда туринг!— деб айтибди. Борма, яхшилаб қоровул қўй, душманга бостириб қўйма!— депти. Бугу хоқон менга шундай деб айтиб юборибди. Бош лашкарбошига маҳфий гап юборибди: доно Тўнюқуқ ҳушёр, у ўзи билади. Лашкар билан йўлга чиқмоқчи бўлса, унаманг. У гапни эшитиб, қўшинни йўлга солдим. Олтин йишининг ўтиб

бўлмас жойидан ошилик, Иртиш дарёсининг ўтиб бўлмас жойидан кечиб ўтдик, тунда тўхтамадик. Бўлчуга тонг отганда етиб келдик.

Бизнинг кузатувчиларимиз тил тутиб келтирди. Гапи шундай: Йарис даштида ўн туман лашкар йигилди. Бу гапни эшитиб, беклар ҳаммаси қайтайлик, покиза уят яхидир, дедилар. Мен эса шундай деганман, мен доно Тўнюқуқ: Олтин йишни ошиб келдик, Иртиш дарёсини кечиб келдик. Жангчиларнинг келгани қаҳрамон, деганлар. Душман сезмай қолди. Тангри, Умай, муқаддас ерсув душманни босиб берган кўринади. Нега чекинамиз, душманни кўп деб, нега қўрқамиз, ўзимизни оз деб. Қани босайлик, ҳужум қилайлик, дедим. Ҳужум қилдик, душманни тор-мор қилдик. Иккинчи кун келди. Урушдик. Уларнинг қўшини бизнидан икки қаноти ярмича ортиқ эди. Тангри ёрлақагани учун, душман кўп деб биз қўрқмадик, жанг қилдик. Тардущ шади ҳам ўн ўқ хоқони томонда иштирок қилди. Уларни ҳам тор-мор қилдик, хоқони, йабғуси, шади ўша ерда ўлдирилди. Элликтacha йигитни тутдик ва ўша кечасиёқ ҳар бирини ўз халқига жўнатдик. У гапни эшитиб, ўн ўқ беглари, халқи, ҳаммаси бизга бош эгиб келди. Келган бекларни, халқини суриб, озгина халқ қочган эди. Ўн ўқ лашкарини жанг қилдирдим. Биз ҳам лашкар тортдик, уни қувдик. Инжу ўғизни кечиб Тинси ўғли етадиган Банглигак тоғини ошиб ўтиб, Темир дарвозагача қувиб бордик. Ўша ердан қайтардик. Инал хоқонга араб ва тухор (арабларнинг иттифоқдоши) ҳужум қилди. Ушанда ажралағинган чоки бор дубулға кийган сўғдоқ халқи ҳаммаси келди. Ўша куни ҳужум қилди. Турк халқи Темир дарвозага, Тинси ўғли ётадиган тоққа етди. Эгаси йўқ экан. У ерга мен, доно Тўнюқуқ етказиб борганим учун сариқ олтин, оқ кумуш, қиз-жувон, эгри тия, ипак ҳадсиз келтирдилар. Элтариш хоқон доно маслаҳатчиси бор учун, қаҳрамони бўлгани учун Табғачга қарши ўн етти марта уруш қилди. Қитанийларга қарши етти марта уруш қилди. Ўғузга қарши беш марта уруш қилди. Ушанда маслаҳатчиси ҳам менинг ўзим эдим, урушувчи ҳам мен ўзим эдим. Элтариш хоқонга, Турк Бўгу хоқонга, Турк Билга хоқонга хизмат қилдим, тун ухламай, кундуз ўтирмай, қизил қонимни тугатиб, қора терим югуртиб, меҳнатни, кучни бердим, ахир, мен ўзим узоқларга босқин уюштириб турдим. Қўнғир қўй, оқ отни катта қилдим. Босиб олишга урина-диган душманни поймол қилар эдим. Хоқоним билан лашкарлар тортдик, тангри ёрлақасин! Бу турк халқига қу-

ролли душманни келтирмадим, яловли отни югуртирамдим. Элтариш хоқон муваффақият қозонмаса, унга қўшилиб мен ўзим муваффақият қозонмасам, давлат ҳам, ҳалқ ҳам йўқ бўладиган эди. Хоқоним муваффақият қозонгани учун, мен ўзим муваффақият қозонганим учун давлат ҳам давлат бўлди, ҳалқ ҳам ҳалқ бўлди, ўзим чол бўлдим, улғайдим. Аллақандай ердаги хоқонлик ҳалққа дон сўк бўлса ҳам, нима ғами бўлар эди?

Турк Билга хоқон давлатида бу битигни ёздиридим, Мен Билга Тўнюқуқ, Элтариш ҳоқон муваффақият қозонмаса эди, у бўлмаса эди, мен ўзим, доно Тўнюқуқ, муваффақият қозонмасам эди, мен бўлмасам эди, Қапаган хоқон бошлиқ Турк сир ҳалқи ерида уруғ ҳам, ҳалқ ҳам, киши ҳам, турк ҳалқи ерига хўжайин ҳам бўлмас эди.

Элтариш хоқон ва доно Тўнюқуқ муваффақият қозонгани учун Қапаган хоқон, Турк сир ҳалқи юрган бу давлат яшаб турибди. Турк Билга хоқон Турк сир ҳалқини, ўғуз ҳалқини тарбият қилиб турибди.

ҚУЛ ТИГИН БИТИГИ

Бу битигтош турк хоқони Элтариш хоқоннинг кичик ўғли Кул тигин қабрига қўйилган. Кул тигин 731 йил 27 февралда қирқ етти ёшида вафот этади. Битигтош 732 йилда ўрнатилган.

Кул тигин битиги баландлиги 3 метр 25 см. бўлган мармарга ўйиб ёзилган. Кул тигин битигидаги барча воқеалар Кул тигиннинг акаси Билга хоқон тилидан (асли исми Мўғулиён) ҳикоя қилинади. Битигни Кул тигиннинг жияни Йўллуғ тигин ёзган.

Мазкур битигда Билга хоқоннинг оға-иниларига, қариндош-уруғларига, ҳалққа мурожаат қилиб, уларнинг адашувлари натижасида турк элига кўп фалокатлар келганилиги уқтирилади. Туркийларнинг ҳарбий юришлари, қўшини бўлган табғачларнинг босқинчлилиги ва ҳийлакорлиги натижасида ҳалқ бошига тушган кулфатлар ағсус-надомат билан ҳикоя қилинади.

Бу сўзларни Билга хоқоннинг турк ҳалқига қаратадайтган, чуқур лиризм билан сугорилган юрак сўзлари десса бўлади. Хоқоннинг мурожаатидан мақсад — ҳокимиятни мустаҳкамлаш, ўзаро уруш-жанжалларга чек қўйиш, иттифоқ бўлниб яшашдир.

Кул тигин афсонавий эпик руҳда тасвириланади, дос-
тонлардаги сингари доно, баҳодир инсон сифатида тас-
вириланади.

Бадиият нуқтаи назаридан ўз даврида юксак савия-
да ёзилган бу битиг туркий халқлар ёзма адабиётининг
ривожига туртки берган.

ҚУЛ ТИГИН БИТИГИ

Фалакдай худодан бўлган турк доно хоқони бу таҳт-
га ўтиридим. Сўзимни тугал эшиггин, кейинимдаги ини,
жияним, ўғилларим, қон-қардошим, халқим, ўнгдаги ша-
дапит беклар, чапдаги тархонлар, буйруқ беклар, ўттиз
тўққиз ўғиз беклари, халқи, бу сўзларимни яхшилаб
эшишт, диққат қилиб тингла!

Олдинга — кунчиқарга, ўнга — кун юришга, орқага —
кунботарга, чапга — тун ўртаси (шимол) гача бўлган ер-
даги халқлар ҳаммаси менга қарайди. Шунча халқни
йиғдим. У энди ёвуз эмас. Турк хоқони Ўтукан йишла
турса, элда ташвиш йўқ. Шимолга — Шантунг чўлигача
лашкар тортдим, денгизга бир оз етмадим, Жанубга Тў-
қуз арсан қабиласигача лашкар тортдим, Тибетга бир оз
етмадим. Фарбда Сирдарёни кечиб ўтиб, Темир дарво-
загача лашкар тортдим. Шимолга — Ер Байирқу еригача
лашкар тортдим, шунча жойгача юриш қилдим. Ўтукан
йишда яхши ҳоким йўқ экан. Давлатни тутиб турадиган
ер Ўтукан йиш экан. Бу ерда ўринашиб, Табғач халқи би-
лан муросага келдим. Олтин, кумуш, ичкилик, ипакни
шунча ҳисобсиз берадётган Табғач халқи сўзи ширин,
ипак кийими нафис экан. Ширин сўзи, ипак кийими би-
лан алдаб, йироқ халқни шу хилда яқинлаштирас экан.
Яхши қўшни бўлгандан кейин ёвуз илмни у ерда ўрганар
екан.

Яхши, доно кишини, яхши алп кишини йўлатмас экан.
Бирор киши адашса, уруғи, халқи, уйи, ёпинчигигача
қўймас экан. Ширин сўзига, нафис ипагига алданиб, кўн-
турк халқи, ўлдинг. Эй турк халқи, ўлдинг. Эй турк хал-
қи, айриминг жанубга — Чуғай йишга, Тўғ, Элтан чўли-
га манзил қилай десанг, Турк халқининг айримини у ер-
да ёвуз киши шундай пишиқлар экан: йироқ бўлса, ёмои
ипак беради, яқин бўлса, яхши дебо беради, деб шу
хилда пишиқлар экан. Илмсиз киши у сўзга ишониб,
унга яқинлашиб кўп, киши ўлди.

Шимолга борсанг, эй турк халқи, ўлажаксан. Ўтукан

ерга ўрнашиб карвон юбориб турсанг, ҳеч қандай ташвиш йўқ. Утукан иишни манзил қилсанг, мангу давлатни сақлаб туражаксан, эй турк халқи, тўкис ишонувчансан. Самимий, носамимийни ажратмайсан, ким қаттиқ гапирса, самимийни ҳам танимайсан. Ўшандайлигинг учун тарбият қилган хоқонингнинг сўзини олмайин ҳар қаерга кетдинг, у ерларда бутунлай ғойиб бўлдинг, номнишонсиз кетдинг. Ўша ерда қолганинг ҳар ерда зўрға ўлиб-тирилиб юрган эдинг. Тангри ёрлиқагани учун, искеъдодим, бахтим бор учун мен сизларга хоқон бўлдим. Хоқон бўлиб йўқ қашшоқ халқни яхшилаб оёққа турғаздим. Қашшоқ халқни бой қилдим. Оз халқни кўпайтирдим. Ё бу сўзимда ёлғон борми?! Турк беклари, халқи, буни эшитинг! Турк халқини тўплаб давлат тутишингизни бу ерда тошга ўйиб ёздим. Адашиб айрилганингни ҳам бу ерда ёздим. Нимаики сўзим бўлса мангу тошга ўйиб ёздим. Унга қараб билинг, туркнинг эндиги халқи, беклари. Уй, дунёгагина қарайдиган, кўзига фақат мол-мулк кўринадиган беклар, сизлар гумроҳсизлар. Мен мангу тошга ҳаммасини ўйиб ёздим. Табғач хоқонидан наққош келтирдим, нақшлатдим. Менинг нутқимни бузмади.

Табғач хоқони ўз наққошини юборди. Кул тигинга зиёратгоҳ яраттирдим. Ичи-тошига маҳсус нақш солдирдим. Тош ўрнаттирдим, кўнгулдаги сўзларимни у тошга ёздим. Ун ўқ авлодигача, тотгача буни кўриб билинг! Мангу тош ўрнаттирдим. Бу сайдроҳ бўлгач, мақбара сайдроҳ ерда бўлса. Шундай сайдроҳ ерда мангу тош ўрнаттирдим. Ёзув битидим. Уни кўриб шундай деб билинг: бу битиг битилгувчининг (яъни Кул тигиннинг) жияни Йўллуғ тигиндир.

Юқорида кўк осмон, пастда қўнғир ер яратилганда, иккисининг ўртасида инсон болалари пайдо бўлган. Инсон болалари устидан ота-бобом Бўмин хоқон, Истами хоқон хоқон бўлиб ўтирганлар. Улар тахтга ўрнашиб, турк халқининг давлатини, қонун-қоидаларини тутиб турганлар, риоя қилиб турганлар.

Тўрт тараф бутунлай душман экан. Лашкар тортиб, тўрт тарафдаги халқни бутунлай олганлар, бутунлай тобе қилганлар. Боши борнинг бошини эгиб таъзим қилдирганлар, тиззаси борни чўккалатганлар. Шарққа — Қадирқан иишга, фарбга — Темир дарвозагача ўрнашганлар. Қадирқан билан Темир дарвозанинг орасида хўжайнисиз, уруғ ҳокимиятисиз, чекланмаган ерга бўлиб, асл турк шу тарзда яшар экан. Улар доно хоқон

экан, баҳодир хоқон экан, вазирлари ҳам доно ва ботир бўлиан бўлиши керак, беклари ҳам, халқи ҳам тўғри экан. Шунинг учун давлатни шу хилда тутиб турган эканлар, давлатни тутиб, қонун-қоидаларини яратган, ўзи шу тарзда яшаб, вафот қилган.

Азачи, йиғичилар шарқдан — кун чиқардан Букли чўлилик халқ, Табғац, Тибет, Авар, Рим, Қирғиз, Уч қуриқан, ўттиз татар, Қитан, Татаби — шунча халқ келиб, йиғлаган, аза тутган. Шундай машҳур хоқон экан. Шундан кейин укаси хоқон бўлган экан. Ўғли ҳам хоқон бўлган экан. Ундан сўнг иниси оғасидай иш тутмаган экан, ўғли отасидай иш тутмаган экан. Тахтга жоҳил хоқон ўтирган экан, бадфеъл хоқон ўтирган экан. Вазири ҳам билимсиз экан, қўрқоқ экан.

Беклари, халқи инсоғиз бўлгани учун, табғац халқи ҳийлакор бўлгани учун, тоймас бўлганлиги учун, фирибгар бўлгани учун, оға ва инини бир-бирига қайрагани учун, беги ва халқини бир-бирига чаққани учун турк халқи эллашган давлатини қўлдан чиқариб юборган.

Хоқонлик қилиб турган хоқонини ўқотиб юборган. Табғац халқига бек бўладиган ўғил боласи билан қул бўлди, сулув қиз боласи билан чўри бўлди. Турк беклари туркча отини ташлади, табғацbekларининг табғачча отини қабул қилиб, Табғац хоқонга қарам бўлди. Эллик йил меҳнатини, кучини сарф қилибди. Шарқда — кунчиқарда Бўкли хоқонигача лашкар тортиб берибди, фарбда Темир қопиққача лашкар тортиб берибди. Табғац хоқонига туркларнинг давлатини, ҳукуматини олиб берибди... Турк фуқароси, барча халқ шундай дебди: «Давлатни халқ эдим, давлатим энди қани? Кимга давлатни эгаллаб беряпман? — дер экан. — Хоқонли халқ эдим, хоқоним қани? Қайси хоқонга меҳнатимни, кучимни сарф қиляпман?» — дер экан. Шундай деб Табғац хоқонига қарши бўлибди. Қарши бўлиб, қувилиб, ўзини тиклашга умид қилиб, яна таслим бўлибди. Шунча меҳнатини, кучини сарф этганини андиша қилмай, Табғац хоқони турк халқини ўлдирайин, уруфини қолдирмайин», — дер экан ва уни ўқотиб бораётган экан. Аммо юқорида турк осмони, туркнинг муқаддас ери, суви шундай дебди: «Турк халқи ўйқ бўлмасин», деб, «халқ бўлсин», деб отам Элтариш хоқонни, онам Эл билга хотунни тангри ўз марта басида тутиб, юқори кўттарған экан. Отам хоқон ўн етти эр билан четга чиқиб кетган. Четда юрибди деган овозани эшишиб, шаҳардаги тоқقا чиқибди, тоғдаги пастга тушибди, йиғилиб етмиш жангчи бўлибди. Тангри куч

бергани учун отам хоқоннинг лашкари бўридай экан, душмани қўйдай экан, Шарққа-ғарбга лашкар тортаб, одам йиғибди, оёққа турғизибди. Ҳаммаси йиғилиб, етти юз эр бўлибди. Етти юз эр бўлиб, давлатини йўқотган хоқонини йўқотган халқни, чўрига айланган, қулга айланган халқни, турк ҳукмронлигини бой берган халқни отабоболарим қонун-қоидалари бўйича бошқарибди, ташкил қилибди. Тўлис, тардущ халқини шу пайтда оёққа турғизганлар.

Ябғуни, шадни ўшандага тайинлабди. Жанубда табғач халқи душман экан, шимолда Баз ҳоқон, Тўққиз ўғиз халқи душман экан, қирғиз, қуриқан, ўттиз татар, қитаний, татаби бутунлай душман экан. Отам хоқон бунча душманга тенглашиб, қирқ етти марта лашкар тортган, йигирма марта жанг қилган. Тангри ёрлиқагани учун давлати борни давлатсизлантирган, хоқони борни хоқонсизлантирган, душмани эл қилган, тиззаси борни чўккалатган, боши борни эгиб таъзим қилди. Шу хилда ҳукмронликни эгаллаб, вафот этган. Отам хоқоннинг қабрига биринчи қилиб Баз хоқонининг балбали тикилди. Уша ҳукумат бошига амаким хоқон бўлиб ўтирди. Амаким хоқон халқни яхшилаб тузатди, тарбият қилди. Камбағални бой қилди.

Амаким хоқон бўлиб турганда ўзим тардущ халқи устидан шад эдим. Амаким хоқон билан Шарққа Яшил ўгуз (Хуанхэ дарёси) Шантунг текислигигача лашкар тортдик, ғарбга—Темир дарвозагача лашкар тортдик. Кўгман ошиб, Қирғиз ерига лашкар тортдик.

Ҳаммаси бўлиб йигирма беш марта лашкар тортдик, ўн уч марта жанг қилдик, давлати борни давлатсизлантирилди, хоқони борни хоқонсизлантирилди, тиззаси борни чўккалатди, боши борни таъзим эттирилди. Тургаш хоқон туркимиз эди, билмагани учун бизга нисбатан янглишгани учун хоқони ўлди, вазири, беклари ҳам ўлди. Ўн ўқ халқи қийинчилик кўрди. Бобомиз, аждодимиз бошқарган ер-сув эгасиз бўлмасин деб, аз халқини тузатиб, тиклаб келдик, жанг қилдик. Аз халқига Барс бек эди. Хоқон унвонини бунда биз бердик. Синглим хоқонзодани бердик. Ўзи адашди, хоқони ўлди, халқи чўри, қул бўлди. Кўгман ер-сув эгасиз қолмасин деб, оз қирғиз халқини тиклаб, қайтиб бердик. Шарқда Қадирқан йишини ошиб, халқни шу хилда жойлаштирилди, шу тарзда тузатдик. Ғарбда Қангу Тармангача турк халқини шу ҳолда жойлаштирилди, шу хилда тузатдик. У замонда қул қулга эга бўлган эди, чўри чўрига эга бўлган эди.

Шу хилда қозонилган, барпо этилган давлатимиз, қоңда-қонунларимиз бор эди: Гурк ўғуз беклари, эй халқ, эшитинг! Тенадан осмон босмаган бўлса, пастда ер ёрилмаган бўлса, эй турк халқи, давлатингни, ҳукуматингни ким бузди?

Укин, пушаймон бўл, кўргилигинг, тақдиринг учун, тарбият қилган доно хоқонингга, емирилган, қўлдан кетган яхши давлатингга. Ўзинг адашдинг, орага ёмонни киргиздинг. Қуролли қайдан келиб тарқатиб юборди, найзали қайдан келиб суринг кетди. Муқаддас Ўтукан йишга бординг, шарққа боролгунча бординг, ғарбга борилгунча бординг. Борган ерда яхшилик шу бўлди: қонинг сувдай оқди, суюгинг тоғдай уюлиб ётди, бек бўла-диган ўғил боланг қул бўлди, сулув қиз боланг чўри бўлди. Билмаганинг учун, ёмонлигинг учун амаким хоқон ўлиб кетди.

Унга бошлаб Қирғиз хоқонининг балбалини тикдим. Турк халқининг номи, донги йўқ бўлмасин деб отам хоқонни, онам хотун маликани юқори кўтарилилган тангри, давлат берадиган тангри турк халқининг номи, донги йўқ бўлмасин деб, ўзимни у тангри хоқон қилиб ўрнатди, шекилли. Мол, йилқилик халққа хоқон бўлиб ўрнашмадим. Ичи ошсиз, тоши кийимсиз оч-яланғоч ёвуз, ёмон халқ уза ўрнашдим. Иним Кул тигин билан сўзлашдик: отамиз, амакимиз қозонган халқнинг оти, донги йўқ бўлмасин деб, турк халқи учун тун ухламадим, кундуз ўтирилиб муваффақият қозондим. Шу хилда қозониб бирлашган халқни бир-бирига ўт-сув қилмадим. Мен ўзим хоқон бўлиб ўрнашганимга ҳар ерга кетган халқ ўлиб-тирилиб яёв, яланғоч қайтиб келди. Халқни тарбият қилайин деб, шимолга Ўғуз халқи томонга, шарққа Қитанӣ, Татаби халқи томонга, жанубга Табғач томонга катта лашкар билан ўн икки марта урушдим. Ундан кейин, тангри ёрлиқасин, бахтим бор учун, насибан бор учун ўлаётган халқни тирилтириб тарбият қилдим, яланғоч халқни кийимлик қилдим, камбағал халқни бой қилдим, оз халқни кўп қилдим. Паноҳталаб дарлатида, хоқонликда яхшилик қилдим. Тўрт жиҳатдаги халқни бутунлай эл қилдим, бир-бирига дўст қилдим, бутунлай менга қаради. Меҳнатин, кучни берувчи шундай ҳокимииятни қозониб иним Кул тигин вафот этди. Отам хоқон учгандага (ўлганда) иним Кул тигин етти ёшда қолди, ўн ёшда Умайдай онам хотун бахтига иним Кул тигин эр деган ном топди. Ўн олти ёшида амаким хоқон давлатини,

ҳокимиятини шу хилда қўлга киритди. Олтин чўб вилоят сұғдлари томонга лашкар тортдик. Тор-мор қилдик. Табғач, ўнг Тутуқдан беш туман қўшин келди, урушдик.

Кул тигин яёв отилиб ҳужум қилди. Ўнг Тутуқ йўлбошчисининг яроқли қўлини тутди, яроқланган ҳолда хоқонга армуғон қилди. У лашкарни ўшанда йўқ қилдик. Йигирма бир ёшида Чача Сангунга уруш қилдик. Энг аввал Тадқан Чурнинг бўз отини миниб ҳужум қилди, у от ўшанда ўлди. Иккинчи бор Ишбара Ямтарнинг бўз отини миниб ҳужум қилди, у от ўшанда ўлди. Учинчи бор Еган Силиг бекнинг тўриқ отини миниб, ҳужум қилди, у от ўшанда ўлди. Яроғига, ёпинчиғига юздан ортиқ ўқ билан урди. Баданига, бошига битта тегмади.

Ҳужум қилганини, турк беклари, яхши биласиз. У лашкарни йўқ қилдик. Ундан кейин Ер Байирқули Улуғ Эркин душман бўлди. уни пароканда қилиб, Турғи ярғун кўлда тор-мор қилдик, Улуғ Эркин озгина йигити билан қочиб кетди. Кул тигин йигирма олти ёшида Қирғиз томонга лашкар тортдик. Найза ботими қорни ёриб, Қўғман йишга кўтарилиб юриб, Қирғиз халқини уйқуда босдик. Хоқони билан Сунга йишда жанг қилдик. Кул тигин Байирқунинг оқ отини миниб отилиб ҳужум қилди. Бир эрни ўқ билан урди, икки эрни кетма-кет қилиб санчди. Уша ҳужумда Байирқунинг оқ айғирини кураги билан синдириб урди. Қирғиз хоқонини ўлдиридик, давлатини олдик. Уша йили Турғаш томонга Олтин йишга кўтарилиб, Иртиш дарёсини кечиб юрдик. Турғаш халқини уйқуда босдик. Турғаш хоқон лашкари Бўлучуда ўтдай, бўрондай келди. Жанг қилдик. Кул тигин Башғу номли бўз отни миниб ҳужум қилди.

Ўшанда жангга кириб Турғаш хоқоннинг вазирини, Аз тутуғини ўз қўли билан ушлади. Хоқонини ўшанда ўлдиридик, элинин олдик. Қора оддий Турғаш халқи бутунлай таслим бўлди. У халқни Табарда жойлаштиридик. Қайтиб бориб сұғдақ халқини тузатайин деб, Сирдарёни кечиб Темир дарвозагача лашкар тортдик. Ундан кейин қора Турғаш халқи душман бўлган Кенгарас томонга борди. Бизнинг лашкарларимизнинг оти ориқ, озиғи йўқ эди.

Алп эр бизга ҳужум қилган эди. Ушандай замонда хафа бўлиб Кул тигинни озгина эр билан излатиб юбордик. Катта жанг қилибди. Алп Шалчининг оқ отини миниб, ҳужум қилибди. Қора Турғаш халқини ўшанда ўлдирибди, қўлга олибди. Қайтиб юриб Кушу тутуқ билан жанг қилибди, унинг жангчиларини бутунлай ўлдириб-

ди. Уйини, бор нарсасини битта ҳам қолдирмасдан ҳам-
масини келтирди. Кул тигин йигирма ети яшарлигидан
қарлуқ халқ бегоналашиб кетгач, душман бўлди. Биз
улар билан Тамғидуқ башда жанг қилдик.

Кул тигин шу жангда ўттиз яшар эди. Алп Шалчининг
оқ отини миниб отилиб ҳужум қилди. Душманнинг
икки жангчисини бирин-кётин қилиб санчди.

Биз қарлуқни ҳам қўлга олдик. Аз халқи душман
бўлди. Улар билан Қоракўлда жанг қилдик. Бу пайтда
Кул тигин ўттиз бир яшар эди. У алп Шалчининг оқ оти-
ни миниб отилиб ҳужум қилди. У от ўшанда ўлди. Изгил
халқи ҳам ўлди. Тўққиз ўғуз халқи ўз халқим эди, еру
осмон фитнага тўлгани учун ҳам бизга душман бўлди.
Бир йилда беш марта жанг қилдик. Энг аввал Тўғу шаҳ-
рида жанг қилдик.

Кул тигин Азманинг оқ отини миниб отилиб ҳужум
қилди. Олти жангчисини ўлдирди. Қўшин ҳужум қил-
гандан еттинчи жангчини қилич билан чопди.

Иккинчи марта Қушлағакда Адиз билан жанг қил-
дик. Кул тигин Аз деган йигитнинг кулранг отини ми-
ниб, отилиб ҳужум қилиб, бир жангчини санчди, тўққиз
жангчини атрофида айланиб чопиб урди. Адиз халқи ўша
ерда ўлди. Учинчи марта Бу...нда Ўгуз билан жанг қил-
дик. Кул тигин Азманинг оқ отини миниб ҳужум қилди,
санчди. Давлатини қўлга киритдик, тўртинчи марта Чуш
бошида жанг қилдик.

Турк халқи оёқдан қолди, ёмон бўладиган эди. Ил-
гари келиб қолган лашкарини Кул тигин қувиб, қаҳрамон
ўнта жангчисини Тўнга тигин азасида қуршаб олиб ўл-
дирдик. Бешинчи марта Азганти Қадазда Ўгуз билан
жанг қилдик. Кул тигин Азнинг кулранг отини миниб ҳу-
жум қилди, икки жангчисини ўлдирди. Шаҳарга қайтиб
бормади. Ўғузнинг лашкари ўшанда ўлди. Мағи қўргон-
да қишлиб, баҳорда Ўгуз томонга лашкаримиз билан
чиқдик. Кул тигин оила аъзоларимизни бошлаб, ўрдага
кетди. Ўғуз душман ўрдани босди. Кул тигин Ўғсизнинг
оқ отини миниб тўққиз жангчини ўлдирди. Ўрдани бер-
мади. Онам хотун, кейинги оналарим, опаларим, келин-
ларим, хонзодаларим, тиригингиз чўри бўлар эди, ўли-
гингиз чўлу биёбонда, йўлда ётиб қолар эдингиз!

Кул тигин бўлмаса, бутунлай бўлар эдингиз. Иним
Кул тигин вафот этди, вужудим алам чекди. Қўрар кўзим
кўрмайтгандай, билар ақлим билмаётгандай бўлди (эс
ҳушимдан ажралдим), жоним азобда қолди. Дунёни
тангри ясайди, инсон болалари ҳаммаси ўладиган қилиб
яратилган.

Шунчалик алам тортдимки, кўзга ёш келганд, кўнгилга йиги келганда, қайта ғам чекдим, қайта қайфурдим. Икки шад, кейинги ини-жияним, ўғилларим, бекларимнинг кўзи, қоши ёмон бўлади деб қайфурдим. Азачи, йиғичилар Қитаний, татаби халқини бошлаб Удар сангун келди. Табғаҳ хоқонидан Исили Ликанг кслди, бир туман ипак, олтин, кумушни ортиқча келтирди. Тибет хоқонининг аёnlаридан бири келди. Гарбдаги — кунбартардаги Суғд, Барчакар, Буқарақ улус ва халқидан Нанг сангун, Үғул тархон келди.

Үн ўқ ўғлимдан, тургаш хоқонидан Мақарач тамғачи, Үғуз билга тамғачи келди. Қирғиз хоқонидан Гардуш Инанчу чур келди. Бино ясовчи, нақш солинган битигтош ясовчи табғаҳ хоқонининг жияни Чанг сангун келди.

Кул тигин қўй йилида, ўн еттинчи куни вафот этди. Тўққизинчи ойнинг йигирма еттисида азасини ўтказдик. Биносини, нақшини, битигтошини маймун йилида, еттинчи ойнинг йигирма еттинчисида бутунлай тугатдик. Кул тигиннинг қабр тошидаги бунча нақшни Туйғун Элтабар келтирди.

Шунча битиг битилувчи Кул тигиннинг жияни Йўллуғ тигиндир. Йигирма кун ўтириб бу тошга, бу деворга ҳамасини мен Йўллуғ тигин битидим. Паноҳталаб ўғлонингизга, таянувчингизга қийинчиликда тарбият қиласар эдингиз. Вафот этдингиз. Тангри яшатувчиидир.

БИЛГА ХОҚОН БИТИГИ

Мазкур битигтош Элтариш хоқонининг катта ўғли — Кул тигиннинг оғаси Билга хоқон шарафига 735 йилда ўрнатилган. Билга хоқонни 734 йилда — эллик ёшида ўз яқинларидан бири заҳарлаб ўлдиради. Бу битиг ҳам Йўллуғ тигин томонидан ёзилган. Вақт ўтиши билан битигтош ағдарилиб, уч бўлакка ажралган, ёзув ҳам ачча заарланган.

Битигда Билга хоқонининг давлатни адолатли бошқарганлиги, кўпгина халқларни бирлаштиргани, мамлакатни иқтисодий жиҳатдан юксалтирганини Йўллуғ тигин маҳорат билан тасвирлайди. Халқ хоқонидан, ватанидан айрилмаса, эзгулик кўриши, баҳтили, беташвиш бўлиши жуда ифодали қилиб баён этилади. Кўзига фақат молмулк кўринадиган давлат бошлиқлари гумроҳдир, деб таъкидланади мазкур битигда. Билга хоқон давлатнинг қудрати ҳақида сўзлайди. Бу даврда йўл қўйилган ха-

толарни келажак авлод тақрорламаслигини маслаҳат бепади.

Орадан бир неча асрлар ўтган бўлса-да, Билга хоқон ва Қул тигин битигидаги айтилган панд-ўғитлар — ватанин ҳимоя қилиш, иттифоқ бўлиб яшаш, урушларга чек қўйини бугунги кунда ҳам ўз овози билан жаранглайди.

БИЛГА ХОҚОН БИТИГИ

Фалакдай тангри яратган Турк Билга хоқон сўзим: отам турк доно хоқони тахтга ўтирганда тўққиз ўғуз қаҳрамонлари, унинг машҳур беклари ва унинг халқи ҳурмат кўрсатдилар.

Ўн етти ёшимда Тангут тарафга лашкар тортдим. Тангут халқини енгдим, ўғлини, бор нарсасини, йилқисини, мол-мулкини олдим. Ўн саккиз ёшимда Олти чуб сүфдақ томонга қўшин тортдим, халқини ўшанда тор-мор қилдим. Табғач ўнг тутуқдан беш туман қўшин келди. Идар бошда жанг қилдим, у қўшинни ўша ерда йўқ қилдим.

Басмил, идиқут қариндош халқим эди, карвон юбор-майди деб қўшин тортдим, таслим қилдим.

Йигирма икки ёшимда Табғач томонга лашкар тортдим. Чача сангуннинг саккиз туманлик қўшини билан урушдим. Қўшинини ўлдирдим. Йигирма олти ёшимда Чинх халқи Қирғиз билан душман бўлди. Кам дарёсинни кечиб ўтиб, Қирғиз томонга лашкар тортдим. Ўрпанд жанг қилдим. Қўшинини тор-мор қилдим, аз халқини таслим этдим. Йигирма етти ёшимда яна Қирғиз томонга лашкар тортдим. Найза ботими қорни ёриб, Кўгман (Саян) йишига кўтарилиб, Қирғиз халқини уйқуда босдим. Хоқони билан Сунга йишида жанг қилдим. Хоқонини ўлдирдим. Давлатини ўшанда олдим. Уша йили Тургаш тарафга Олтин йишини ошиб ўтиб, Иртиш дарёсинни кечиб ўтиб, юриш қилдим. Тургаш халқини уйқуда босдим. Тургаш хоқонининг қўшини ўтдай, бўрондай келди.

Бўлучуда жанг қилдик. Хоқонини, йабғусини, шадидни ўшанда ўлдирдим. Давлатини ўшанда олдим. Уттиз ёшимда Бешбалиқ тарафга қўшин тортдим. Олти марта жанг қилдим, кўп қўшинни ўлдирдим. Бешбалиқдаги не-не кишилар... менга тушунмоқ мақсадида келди. Бешбалиқ шунинг учун омон қолди.

Уттиз бир ёшимда Қарлуқ халқи ниҳоятда узоқлашиб кетиб, душман бўлди. Тамғидуқ башда жанг қилдим. Қарлуқ халқини ўлдирдим, ўша ерда қўлга олдим.

Тўққиз ўғуз менинг халқим эди. Фалак, ер фитнага тўлгани учун, тахтининг куни битгани учун душман бўлди, бир йилда тўрт марта жанг қилдим, энг аввал Тўғу балиқда жанг қилдим. Тўғла дарёсини сузиб ўтиб, кечиб лашкари... иккинчи марта Антарғуда жанг қилдим, лашкарларини енгдим, давлатини олдим. Учинчи марта Чуш бошида жанг қилдим. Турк халқи чарчади, ёмон бўладиган эди, Тўққиз ўғузнинг бизнигини пароканда қилиб келадиган лашкарини қайтардим. Кўп ўладигани ўшанда тирик қолди. Ўшанда Тўнгранинг жангчиси, паҳдавони, бир қабиласини Тўнга тигин азасида қуршаб олиб урдим. Тўртинчи марта Азганти қадазда жанг қилдим. Лашкарини ўша ерда тор-мор қилдим, тинкасии қуритдим. Қирқ ёшимда Мағи қўргонда қишлиганимизда ют бўлди. Баҳорда ўғуз томонга лашкар тортдим. Қўшиннинг олди йўлга чиққан эди, иккинчи қўшин уйда эди, уч ўғуз лашкари босиб келди. Яёв ночор бўлди деб олгани келди. Бир ён лашкар уйни, ҳовлиларни бўшатгани кетди, бир ён лашкар жанг қилгани келди. Биз оз эдик, ночор эдик. Ўғуз... куч бергани учун ўшанда жанг қилдим, пароканда қилдим. Тангри ёрлақагани учун, мен муваффақиятга эришганим учун, Турк халқи ғалаба қозонди. Мен томондан давлат бундай бошқарилмаса, Турк халқи ўлажак эди, йўқ бўлажак эди...

Ўғуз халқи душман бўлди, уни қўлдан чиқариб юборай деб, лашкар тортдим, уйини, зиёратгоҳини буздим. Ўғуз халқи Тўққиз татар билан йиғилиб келди. Ағуда иккита катта жанг қилдим. Лашкарини тор-мор қилдим, давлатини шунда олдим. Шунча муваффақиятга эришиб, тангри ёрлақагани учун ўзим ўттиз уч ёшда хоқон бўлдим... (?)

Юқорида тангри, муқаддас ер-сув, отам хоқон руҳи рози бўлмади. Тўққиз ўғуз халқи ерини, сувини ташлаб Табғачга кетди... Жанубда Табғачда оти, донги йўқ бўлди. Бу ерда менга юқори мартаба насиб бўлди. Мен ўзим хоқон бўлиб ўрнашганим учун Турк халқини пароканда қилмадим. Давлатни, ҳукуматни яхшилаб эгалладим.

Уттиз тўрт ёшимда Ўғуз қочиб Табғачга қўшилди. Ҳафа бўлиб, лашкар тортдим, боласини, бекасини ўшанда олдим...

Татаби халқи Табғач хоқонига қарам бўлди. Элчиси, яхши сўзи, арз-доди келмаётир деб ёзда лашкар тортдим. Халқини мағлуб қилдим...

Табғачнинг отлиқ лашкарини, ўн етти минглик лаш-

карини биринчи куни ўлдирдим. Яёв лашкарини иккинчи куни бутунлай йўқотдим.

Құғ Сәнгүн бошчилигига тўрт туман лашкар келди. Тункар тоғда ҳужум қилиб зарба бердим. Уч туман лашкарни ўлдирдим... Бош болам касал бўлиб, нобуд бўлишига Құғ Сангүнни балбал қилиб тикиб қўйдим. Мен ўн тўққиз йил шад бўлиб турдим, ўн тўққиз йил хоқон бўлиб турдим, давлатни тутиб турдим.

Шунча муваффақият қозониб, отам хоқон ит йили учинчи ойда йигирма олти ёшида (?) вафот этди.

Тўнғич йили бешинчи ойнинг йигирма еттисида дағи маросими ўтказдим. Менга Лисун Тай сангүн бошчилигига беш юз одам келди. Олтин, кумушни ҳисобсиз келтириди. Маросим шамларини (тутатқиларини) келтириб ўрнатиб берди. Сандал ёғочи келтириб... шунча халқ сочини, қулоғини, яноғини кесди. Яхши боқимдаги шахсий отларини; қора кишиларни, олмахонларни ҳисобсиз келтириб, барини қўйиб кетди...

Ўзим хоқон бўлиб турганимда тўрт жиҳатдаги халқни тузатдим, тикладим. Мен Тургаш хоқонга қизимни улуғ маросим билан олиб бордим. Қизини улуғ маросим билан ўғлимга олиб бердим.

Мен яшадим, турк беклари, турк халқим.

Бу хоқонингдан, бу бекларингдан, ерингдан, сувингдан айрилмасанг, турк халқи, ўзинг эзгулик кўражаксан, беташвиш бўлажаксан... Табғач хоқондан наққош келтирдим. Менинг сўзимни бузмади. Табғач хоқони саройидаги наққошини юборди, унга тошни, иморатни ясаттиридим. Ичини, тошини алоҳида нақшлатдим. Ўн ўқ ўғлига, тотига қадар буни кўриб билинг; мангу тош ўйдирив ёздим.

Билга хоқон битигини Йўллуғ тигин ёздим. Бундай иморатни, нақшни... хоқоннинг жияни Йўллуғ тигин, бир ою тўрт кун ўтириб ёздим, нақшладим.

УНГИН БИТИГИ

Унгин битиги Элтариш хоқоннинг яқинларидан бири Элетмиш ябғу ва унинг ўғли Чур йўға шарафига қўйилган деб тахмин қилинади. Битигтош Унгин дарёси (Мўғалистон) бўйидан топилган.

Бу битигтошда ҳам турк халқи чеккан азоб-уқубаглар баён этилади. Элтариш хоқоннинг турк халқини оёққа турғизиб, қайта тиклаши ҳикоя қилинади.

УНГИН БИТИГИ

Ота-бобомиз Йами хоқон тўрт жиҳатдаги халқни ушлаб турган, бирлаштирган, тебратиб, тинчтиб турган. У хон йўқ бўлганидан кейин йўқолган, қўлдан чиққан, тарқаб кетган.

Хоқонлик қилган хоқонини қўлдан берган, ўз ҳолинга қолган турк халқи шарқقا — кунчиқарга, ғарбга — кунботарга, жанубга — Табғачгача, шимолга — йишгача тарқаб кетган.

Қаҳрамон йигитлар балбал тикди. Турк халқининг иоми ҳам йўқ бўлиб кетган эди. Аммо турк халқи йўқолмасин деб, қурбон бўлмасин деб тепадаги осмон айтган экан...

Қапаған ва Элтариш хоқон давлатида вояга етдим. Элетмиш яғбу ўғли, Ишбара Тамған чур Яғбу иниси билга Ишбара Тамған тархон аймоғидан Алп Элетмиш оти...

Сўнгра Табғачдан шимолда?.. Фалончи ёки фалон қабила, ўғуз орасида ети әр душман бўлган. Отам ўшандага тангрikan деб у ерда юрган, хизматини ва меҳнатини қилган.

Тангрikanга хизмат қилдинг деб ёрлиқаган. Шад унвонини ўшандада берган. Шундай бўлганда Тўққиз ўғуз халқи?.. душман экан. Зўр экан. Тангрikan юриш қилибди.

Жуда ёмон, ярамасмиз. Гарчи озни, кўпни кўрсак ҳам, улар баланд келди. Ҳужум қиласийлик дебди. Мен урушидим. Энди беклар ҳам дер эминшки, биз озмиз деб қўрқибдилар.

Отам шад шундай ўтингани, тангрikanни асир олмасин деб... халқ шунда бермасликка қаттиқ ҳаракат қиласан.

Ҳамма шаҳарга етиб бордим, торож қилдим, забт этдим. Лашкарни келди, оддий аскарларини таслим этдим, беги қочди... Табғач халқига зарба бердим, бўйсундурдим, тинчтиб тебратдим... мағлуб қилиб.

Келаётган эдик, икки орада?.. душман бўлди. Алоқадорман деб ўйладим. Олни зот Билга хоқонга ҳам меҳнатини ва кучни беражагим бор экан, забт этиш учун лашқор тортдим, бўйсундирдим. Уйга келганимда, уруш қилиб, забт этиб, инимга, ўғлимга шундай насиҳат қилдим: отам бориб Элтариш хоқонга, ундан айрилмагин, айнимаган Тангрини Билга хоқондан айрилмайлик, деб шундай насиҳат қилдим. Қайтиб борадигани борди Билга хоқон.

нинг халқи кўпайиб борди, шарафли ном учун меҳнатни қилди.

Устимизда — тангри. Қўй йилида, еттинчи ойда қудратли қаҳрамон хоқонимиздан жудо бўлиб қолдингиз, Аллома отагинам, жанозанг, оқ-қизил йиртишингга эришдим. Сув, ер, фалак, олов... кириб эди...

Отагинамга битигтошни тарошлатдим, абадийлаштирувчи тошни ўрнатдим.

МОЮН ЧУР БИТИГИ

Буни фин олими Г. И. Рамстедт 1909 йилда Шимолий Мўғулистоннинг Селенга дарёси бўйидан топган. Битигтош 759 йилда Моюн чур шарафига қўйилган деб тахмин қилинади.

Моюн чур — Уйфур хоқони, лекин урхун ёзуvida тош битилган. Битигтошда Моюн чурнинг туркйлар ҳокимиyatини тугатишдаги воқеалар баён қилинади.

МОЮН ЧУР БИТИГИ

Тангридан бўлган, давлатни барпо қилган Билга хоқон Тулис, тардуш халқини ушлаб турди. Ўтукан атрофидаги халқ бу икки төғ оралиғида эди. Суви Селенга дарёси эди. У ерда давлат гуллаб-яшинаган. Қўшини, у ерда қолган халқи, ўн уйфур ва тўқиз ўғуз халқини юз йил бошқарган. Турк қинчоқлар бизнинг устимиздан эллик йил ҳукмронлик қилди. Мен йигирма олти ёшда эдим. Йигирма олти ёшимда отамга шад унвонини берди. У ерда Бўйла баға тархан менинг отам эди. У туркларни бўйсундириб қайтди. Тўқиз ўғуз халқимни бирлаштирдим. Отам Қул билга хоқон ўз қўшини билан кетди. Мени эса мингбоши қилиб жўнатди. Мен Қайрадан ўнгга бурилишим керак эди. Туркларни бўйсундириб, яна олдинга юрдим. Қайра дарёси бошида уч Биркуда хоқоннинг қўшини билан тўқнашдим. У ерда уларни қувдим. Қора қум (ҳозирги Гоби)ни ошиб ўтдик. Кўгурда, Кўмир тогида Яр дарёси бўйида уч байроқли турк халқига Ўзмиш тигин хон бўлган экан. Қўй йилида унга юриш қилдим. Туркларга қарши иккинчи жанг биринчи ойнинг олтинчи куни бўлиб ўтди. Жангда Ўзмиш тигинни асир қилдим, хотинини ҳам у ерда асирга олдим. Турк халқи-

нинг давлати у ерда тугади. Ундан сўнг келгуси йилда яна ҳужум қилдим.

Уч қарлуқ халқи ёмон ўйга бориб қочиб кетди ва тарбда ўн ўқ халқи билан бирлашди. Тўнғиз йилида уларни тор-мор қилдим.

Улар Тай билга тутиқقا йабғу унвонини берганлар. Шундан кейин отам хоқон вафот этди. Қора халқ менинг ҳокимиyатимга ўтди. Аммо баъзилари Тай билга тутиқ томонидан туриб уни хоқон деб эълон қилдилар. Мен қўшинни тўпладим ва уларга қарши жангга отландим. Улар устидан ғалаба қилдим ва босиб олдим. Булагуга етиб бориб кечаси — қуёш ботганда, жангга кирдим. Ўша ернинг ўзида тор-мор қилдим. Ёруғ бўлганда қочадилар, қоронги тушиши билан яна йигиладилар. Булагуда бирорта ҳам саккиз ўғуз, тўққиз татар қолмади. Иккинчи числода кун чиққанда жангга киришдим. Қулларим, чўриларим, халқимни осмон ва ер қўллади. Уларни ўша ерда санчдим. Айбор, номдор йўлбошчиларни тангри менинг қўлимга берди. Қора, оддий халқни йўқ қилмадим, уйини, биноларини, йилқисини тортиб олмадим. Номдор бошлиқларини жазоладим ва илгаригидай јшайверсин, дедим. Сиз менинг халқимсиз, дедим. Менинг орқамдан юринг дедим. Уларни қўйиб ўзим кетдим, улар келмади. Мен яна уларни таъқиб қилдим. Бурғу деган жойда етиб олдим. Тўртинчи ойнинг тўққизинчи кунида жанг қилдим, санчдим. Йилқисини, молларини, қиз ва хотинларини олиб келдим. Бешинчи ойда улар менинг орқамдан келди, саккиз ўғуз, тўққиз татар ҳам битта қолмай келди. Селенгадан фарб томонга, Йилун кўлдан жанубга, Шип бошигача қўшин тортдим.

Каргун, Сакишин, Шип бошидан душман бизга юриб келдилар, Селенгага қадар қўшин тортди. Бешинчи ойнинг йигирма тўққизинчисида жанг қилдим. Ўша ернинг ўзида санчдим. Селенга дарёсигача сиқиб бориб, улар устидан ғалаба қилдим. Уларнинг кўпчилиги Селенга дарёсини тарқ этиб, менинг орқамдан борди. Мен Селенгани кечиб ўтиб, уларнинг орқасидан кузатиб бордим. Жангда ўн йигитни асир олиб уларга қуйидаги топшириқни юклаб жўнатдим.

Тай билга тутиқ ёмон бўлгани учун, бир-икки номдор кишилари ёмон бўлгани учун, қора халқим, ўлдинг, ётиб қолдинг, яна менинг давлатимга қўшил, ўлмайсан, ётиб қолмайсан, дедим. Бор меҳнатингни, кучингни бергин менга, дедим, икки ой кутдим, келмади. Саккизинчи ойнинг биринчи куни қўшин тортайин, дедим. Баироқ йўл-

га чиққанда, отлиқ одамлар келдилар: душман келаёт-
тир,— дедилар. Душманнинг қўмондони келди. Сакки-
зинчи ойнинг иккинчи куни Аччиқ Алтир қўлида Қасўйни
кечиб ўтиб улар билан тўқнашдим. Ўша ернинг ўзи-
да тор-мор қилдим ва уларни таъқиб қилиб бордим. Ўша
ойнинг ўн бешинчисида Қайра боши ва уч Бирку дарёси
бўйида татарлар билан тўқнашдим. Ярим халқ бизга қў-
шилди, ярим халқ эса қитанларга ўтиб кетди. Мен уйга
қайтиб келиб, Ўтуканда қишини ўтказдим. Душмандан
хавф-хатарсиз эдим, икки ўғлимга Йабғу, Шад унво-
нини бердим, тардуш, тулис ҳалқининг бошчилигини
бердим. Шундан кейин барс йилида чик халқи томонга
юриш қилдим. Иккинчи ойнинг ўн тўртинчисида Қам
дарёси бўйида чиклар билан жанг қилдим. Шу йили чик-
ларни бўйсундирдим.

Сип бошида оқиш ўрда қуришга буйруқ бердим.
Қалъа деворларини қурдирдим. Ёзни ўша ерда ўтказдим,
маросим ўтказдим. Ёзувимни шу ерда яратдим. Шундай
қилиб, ўша йилнинг кузида шарққа юрдим, татарлардан
жавоб кутдим, қуён йилининг бешинчи ойида уларга
ҳужум қилдим...

Ўтукан йишнинг боши у ерда, лашкарингизнинг боши
ҳам у ерда. Идуқ башнинг орқасида — мен Йабаш тукуш
дарёсининг қуилишида ёзни ўтказдим. Саройни ўша
ерга қуришга буйруқ бердим, деворини ҳам барпо қил-
дирдим, минг йиллик, туман кунлик ёзувимни, биномни
ўша ерда ясад, тошга ўйиб ёздирдим. Тўқуз ўғуз беклари
келди, айтдиларки, қабила бошлиғи бизларга душман
экан. Ақлли бекларини ва Қора Булукни ўша ерга ўт-
қазибди, қирғизларга одам жўнатибди. «Сиз қўзғолон
кўтаринг, чикларни ҳам қўзғолон кўтартиринг,— деб-
ди.— Мен ҳам қўзғолон қиласин,— дебди. Қаранг, мус-
тақил бўлиб қолинг. Ўрмонда сиз билан қўшиламиз»,—
деди у.

Тўқуз ўғуз тарафга қўшип тортдим. Тутуқ бош раҳ-
барлигида чик тарафга мингта қисмни жўнатдим, унинг
иттифоқчилари тарафга озгина одам жўнатдим. Ҳушёр
бўлинг, қирғиз хоқони Кўгман ичидা, дедим.

Гам ўз уйингда, дейдилар. У ўзининг отлиқларини
иттифоқчилари томонга жўнатди, унинг иттифоқчилари-
га эса менинг одамларим ҳужум қилдилар, тил тутдилар.
Уларнинг иттифоқчиларига одамлар келди. Қарлуқлар
эса иттифоқчиларига келмадилар, асиirlар шундай деб
айтдилар. Мен Қам дарёсини кечиб ўтиб олдинга юр-
дим. Ўн биринчи ойнинг ўн саккизинчисида уларни Бўл-

Чу дарёси бўйида учратдим. Уч қорлуқларни ўша ерда тор-мор қилдим. Кейин орқага бурилдим ва ўша жойинг ўзида қолдим. Чикларни эса менинг мингта отрядим қувиб етди. Ўша жойда ёзни ўтказиб, маросим ўтказдим. Чик халқига тутуқ бердим (яъни бошлиқ тайинладим). Ишбар ва тархонларни ҳам ўша пайтда тайниладим. Кейин басмил одамлари келди. Қазлук қўлида уларни кўрди, душманлар оз деб улар ўн бешинчи числода Тайған қўли бўйида қўшинни тўпладим, у ердан отрядини уларни қайтариш учун жўнатдим. Одамларим Қора йўталиқ дарёсини кечиб ўтиб келдилар. Мен уларни кутиб олишга чиқдим. Бу пайтда басмиллар лашкарбоши-си қарлуқларга душман бўлиб қолди.

Менга душман бўлиб қолган басмиллар менинг уйимга келди. Мен уларни ўзимга қўшмадим.

Ташқи душманлардан уч қарлуқ, уч идуқ татар, тургашларга қарши Ўтукан ўрмонларида ҳужум қилдим. Бешинчи ойнинг йигирма олтинчисида улар билан урушдим. Мен ғалаба қилдим. Сўнgra тургашлар ва қарлуқларни тор-мор қилиб, уларнинг мол-мулкини, уйини талаб уйимга олиб келдим...

Қарлуқларнинг тирик қолгани ҳаммаси тургаш хоқонига келди... Хитой хоқонининг қизини ва саккиз ўғлини асирга олдим. Кейин хоқон келди, менга ҳурмат кўрсатиб, икки қизини берди. «Сенинг сўзингга учмайин, яна янглишмайин», — деди ва қайтиб кетди. Шундан кейин суғд ба табғачларга Селенга дарёси бўйида Бай балиқ шаҳрини қуришга буйруқ бердим.